



Paraser Legál

Inkumprimentu no lakuna iha Lei Nú. 8/2009 hamosu kebra no impaktu ba serbisu no funsionamentu KAK nian iha prevene no kombate korrupsaun

Komisaun Anti Korrupsaun (KAK) harii ho personalidade jurídika nu'udar pesoa koletiva direitu públiku no nia estatutu nu'udar órgaun polisiál kriminal espesializada hanesan prevee iha provizaun Artigu 3 Lei Nú. 8/2009 ho nia misaun espesial atu prevene no kombate korrupsaun tuir provizaun 4 Lei Nú. 8/2009 kona-ba KAK ne'ebé altera ho provizaun Artigu 112 Lei Nú. 7/2020 kona-ba Medida sira Prevensaun no Kombate Korrupsaun nian.

KAK ne'e kompostu husi Komisáriu ida no Komisáriu Adjuntu ho pesoa apoiu sira hanesan prevee iha provizaun Artigu 6 Lei Nú.8/2009. Komisáriu ne'e propoin husi Governu no designa ka eleitu husi Parlamentu Nasionál ho votu maioria absoluta ho prezensa mínimu deputadu $\frac{3}{4}$ ne'ebé efetivu iha funsaun, ba mandatu tinan 4 hanesan prevee iha provizaun parágrafo 1) Artigu 7, parágrafo 1) Artigu 11 no parágrafo 3) no ba Komisáriu Adjuntu sira konforme Artigu 12 Lei Nú. 8/2009.

Atu aseguera serbisu no funsionamentu Komisaun nian la'o normál, prosesu ba eleisaun ba Komisáriu foun tuir termu mandatu, sei hala'o iha loraun 30 antes mandatu hotu hanesan prevee iha provizaun parágrafo 6) Artigu 11 Lei Nú. 8/2009. Ida ne'e, signifika iha períodu loraun 30 nia loraun Parlamentu Nasionál hili ona Komisáriu. Tanba ne'e, bainhira mandatu Komisáriu hotu ka sesa, bele kontinua keda ona ho tomada pose ba Komisáriu eleitu. Nune'e, Komisaun la "vacuum" no iha nia podér no autoridade hodi hala'o nia serbisu no funsaun sira.

Situasaun ne'ebé akontese iha KAK agora ne'e mak mandatu Komisáriu no Komisáriu Adjuntu sira-nian hotu ona iha 21 Janeiru 2023 no seidaun iha eleisaun ba Komisáriu foun. Situasaun ne'e hatudu aktu inkumprimentu ka violasaun tanba omisaun ba Lei Nú. 8/2009 kona-ba Estatutu KAK nian. Tuir lei, antes loraun 30 Governu propoin ona Komisáriu ba iha Parlamentu Nasionál hodi halo eleisaun. Situasaun ne'e mós kria ona "vacuum" podér iha foti desizaun iha KAK no ida ne'e impaktu direktamente mós ba nia serbisu no funsionamentu iha prevene no kombate korrupsaun.

KAK "vacuum" iha podér tanba la iha provizaun legál ida iha Lei Nú. 8/2009 ne'ebé prevee katak bainhira iha loraun 30 nia loraun antes termu mandatu seidaun iha eleisaun ba Komisáriu foun, Komisáriu no Komisáriu Adjuntu sesante sira nafatin

hala'õ knaar no funsaun to'õ eleisaun ba Komisáriu foun. Nune'e, Lei Nú. 8/2009 sei iha lakuna ne'ebé labele fó solusaun ka alternativa ruma bainhira mosu situasaun hanesan agora.

Situasaun ne'e konsidera grave liu tanba aktu omisaun husi parte órgaun Estadu Parlamentu Nasionál no Governu nian hodi kumpri rekizitu legál ne'ebé lei prevee ona no mós ignora avizu antesipada husi parte KAK nian rasik kona-ba termu mandatu Komisáriu nian.

Tuir fonte kredível ne'ebé JSMP asesu katak Komisáriu sesante fulan ida antes termu mandatu ne'e, haruka ona karta ida ba iha Parlamentu Nasionál no Governu hodi informa kona-ba mandatu Komisáriu no Komisáriu Adjuntu sira nian ne'ebé hotu iha 21 Janeiru 2023 ne'e no nune'e, Parlamentu Nasionál no Governu bele hahú ona prosesu tuir provizaun parágrafu 6) Artigu 11 Lei Nú. 8/2009 nian. Parlamentu Nasionál no Governu la hatan ba karta ne'e to'õ iha 19 Janeiru hanesan ne'e no Komisáriu haruka tan fali karta ida ba iha Parlamentu Nasionál hodi konfirma fali kona-ba karta dahuluk. Iha 20 Janeiru 2023, hela lora ida mandatu hotu, hatan ba karta ne'e, Parlamentu Nasionál bolu Komisáriu ba iha Parlamentu no depois Prezidente Parlamentu Nasionál hasai de'it karta ida hodi autoriza Komisáriu no nia Komisáriu Adjuntu hodi kontinua hala'õ sira-nia knaar to'õ eleisaun no tomada pose ba Komisáriu foun.

Prosesu eleisaun ba Komisáriu foun Parlamentu Nasionál foin hahú iha 13, 14, 20 no 21 Feveiru 2023 bainhira Governu apresenta ka propoin Komisáriu foun. Prosesu ne'e labele la'õ tanba kuórum ba halo deliberasaun la to'õ tuir provizaun parágrafu 1) Artigu 7 Lei Nú. 8/2009 ne'ebé ejize prezensa mínimu deputadu $\frac{3}{4}$ husi deputadu efetivu iha funsaun ka ezije prezensa mínimu deputadu 49 husi deputadu 65.

JSMP preokupa tebes ho situasaun ne'e tanba mosu ona kebra iha KAK tanba nia funsaun interrompe iha nível autoridade no podér foti desizaun nian ka *vacuum* iha podér. Kebra ne'e akontese tanba órgaun sira Estadu nian la kumpri rekizitu sira ne'ebé lei prevee ona no mós lakuna ne'ebé lei ne'e rasik kria hela tanba la iha provizaun ida ne'ebé prevee katak Komisáriu no Komisáriu Adjuntu sira nafatin hala'õ sira-nia knaar no kompeténsia bainhira seidak iha eleisaun ba Komisáriu foun tuir prazu tempu ne'ebé prevee. Nune'e, Komisáriu no Komisáriu Adjuntu atuál sira bele iha baze legál ida atu hala'õ sira-nia devér no hetan sira-nia direitu ba remunerasaun. Alende ne'e, entre kompeténsia sira ne'ebé atribui ba Parlamentu Nasionál iha lei ne'e, lei ne'e mós la prevee ka la atribui kompeténsia ba Parlamentu Nasionál hodi estende mandatu Komisáriu no Komisáriu Adjuntu sira-nian "ho de'it karta" bainhira iha prazu tempu lora 30 antes termu mandatu

hanesan prevee iha provizaun parágrafu 6) Artigu 11 seidak iha proposta no eleisaun ba Komisáriu foun.

Nune'e, aktu Parlamentu Nasionál hodi estende mandatu Komisáriu no Komisáriu Adjuntu atuál sira-nian ho de'it karta ne'e, bainhira haree ba nesesidade no interese nasional ba prevene no kombat korrupsaun, bele konsidera nia validade politika, mezmuke iha Estadu-Direitu Demorátiku, prátika sira hanesan ne'e konsidera prátika la di'ak, tanba la tuir lei no la iha lejitimidade tanba la representa maioria parlamentár. Iha parte ida, mezmuke desizaun ba estensaun ne'e halo liu husi plenaria no representa maioria parlamentár, aktu ne'e nafatin la iha validade, bainhira la halo alterasaun ba lei ne'ebé atribui mandatu ne'e. Nune'e, dalan ne'ebé própriu no prátika di'ak iha Estadu-Direitu Demorátika mak halo alterasaun ba própriu lei ne'ebé regula kona-ba mandatu ne'e hodi bele halo estensaun ba mandatu bainhira seidak iha eleisaun ba Komisáriu foun.

JSMP mós haree katak, problema ne'ebé KAK hasoru relasiona ho Lei Nú. 8/2009, alende lakuna ne'ebé iha, lei ne'e kria mós dezafiu ka bareira politiku no tékniku boot ida ba Parlamentu Nasionál atu halo desizaun ka halo eleisaun ba Komisáriu foun ho estabelese rekezitu prezensa mínimu deputadu $\frac{3}{4}$ ka 49 husi deputadu efetvu 65. Realidade ne'e hatudu katak dala 4 ona mak Parlamentu Nasionál ajenda eleisaun ba Komisáriu ne'ebé Governu propoin, maibé la konsege tanba la iha kuórum ho prezensa deputadu mínimu 49.

Haree ba situasaun no realidade ida ne'e, JSMP konklui nia hanoin no analiza ida ne'e hodi hato'o nia rekomendasaun balun atu Parlamentu Nasionál bele haree no konsidera hodi bele fó solusaun ba problema ne'e. Rekomendasaun sira ne'e hanesan tuir mai ne'e:

- 1) Parlamentu Nasionál no Governu atu labele kontinua aktu omisaun ka inkumprimentu ba lei sira ne'ebé relasiona ho ezersísiu sira-nia poder no kompeténsia hanesan Lei Nú. 8/2009, partikularmente kona-ba proposta no eleisaun ba Komisáriu KAK nian ne'e;
- 2) Parlamentu Nasionál atu iha futuru labele estende mandatu sira ne'ebé atribui liu husi lei ho karta, maibé tenke ho lei, nune'e, bele iha validade legál;
- 3) Parlamentu Nasionál, molok ajenda eleisaun ba Komisáriu foun, presiza halo uluk ajenda ba alterasaun ba Lei Nú. 8/2009 hodi loke dalan ba Komisáriu no Komisáriu Adjuntu sesante sira kontinua hala'o sira-nia knaar no kompeténsia bainhira seidak iha Komisáriu foun. Provizaun ne'e bele koloka depoisde provizaun parágrafu 6) Artigu 11 Lei Nú. 8/2009 katak bainhira iha prazu tempu ne'ebé iha número anteriór seidak iha eleisaun ba Komisáriu foun, Komisáriu no Komisáriu Adjuntu sesante sira bele kontinua

ezerse sira-nia mandatu to'o eleisaun no tomada pose ba Komisáriu no Komisáriu Adjuntu foun sira;

- 4) Parlamentu Nasionál atu bele halo alterasaun ba iha provizaun parágrafu 1) Artigu 7 Lei Nú. 8/2009 hodi inklui kandidatu ba komisáriu ne'ebé Governu propoin ba Parlamentu Nasionál liu husi ema ida. Alende ne'e, hasai tiha rekezitu ho prezensa mínimu $\frac{3}{4}$ husi deputadu ne'ebé efetivu iha funsaun ba prezensa mínimu liuhusi $\frac{1}{2}$ husi deputadu sira ne'ebé efetivu iha funsaun. Ida ne'e signifika katak bainhira kuórum iha ona deputadu 33 ba leten, Parlamentu Nasionál bele halo ona deliberasaun. Bainhira Parlamentu Nasionál la halo hanesan ne'e mak sei susar atu sai husi situasaun ida ne'e. Nia votu bele mantein ho maioria absoluta, maibé nia prezensa hodi halo deliberasaun mak muda. Nune'e, konteúdu husi provizaun ne'e bele hanesan ne'e: "Komisáriu eleitu ho votu maioria absoluta entre kandidatu sira ne'ebé Governu propoin ho prezensa mínimu liu husi $\frac{1}{2}$ deputadu sira ne'ebé efetivu iha funsaun" ka "*O comissário é eleito pelo Parlamento Nacional de entre os candidatos propostos pelo Governo, por maioria absoluta de mais de $\frac{1}{2}$ dos deputados efectivos em funções*";
- 5) Governu atu kria regulamentu ida ne'ebé sai nu'udar matadalan atu regula kona-ba mekanizmu ba prosesu rekrutamentu Komisáriu KAK ho transparente, kompetitivu no evita konfliktu interese liuhusi kria Komisaun Eventuál independente ida ne'ebé nia kompozisaun mai husi ema péritu sira iha setór judisiáriu nian no mós akademista. Kandidatu sira ne'ebé selesionadu ne'e sei apresenta ba Konsellu Ministru hodi hili kandidatu sira (liu ema ida) ne'ebé competente no iha valor di'ak hodi propoin ba Parlamentu Nasionál hodi halo eleisaun.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Website: <http://jsmp.tl>